

曾文正公奏議卷三

縷陳各路軍情疏

奏爲疊奉

諭旨縷陳各路軍情恭摺奏祈

聖鑒事竊

臣前調周鳳山一軍飭令先攻瑞州後勦臨

江以瑞州逼近省垣僅百二十里也厥後周鳳山至省
與陸元烺等熟商瑞臨在河之西與省城尚有一水之
隔樟樹鎮在河之東于省城尤爲肘腋之患遂舍瑞州
不攻改爲先攻樟樹次勦臨江之策迨後復樟樹一鎮
新淦一縣本可渡河以勦臨江因吉安被圍緊急司道

等移文周鳳山囑其赴援以解吉安之圍臬司周玉衡知府陳宗元在圍城之中亦飛書請援于周鳳山迫切待命往返耽延遂逾二旬臣與撫臣文俊函商省城爲根本之地瑞臨爲切近之災決計先勦臨江無得以四處告警東瞻西顧徒延時日此周鳳山一軍未克遽赴瑞州與臣前奏不符之實情也又奉

上諭曾國藩現駐南康兵勇共有若干能否嚴扼九江之衝卽著妥籌布置不可專顧一路等因欽此伏查九江爲陸路入省之駟道南康爲水路通省之總滙青山

距兩府城各四十餘里臣之水軍久駐青山兩岸皆以
陸軍護之實與九江呼吸相通自周鳳山潯軍撤去之
後九江小池口湖口梅家洲四處之賊日夜環伺十一
月二十日東岸湖口大戰臘月初三日西岸青山大戰
幸獲全勝均經奏明在案厥後又有土匪二千餘人自
湖北興國州而來竄踞德安縣城去來不定聚散無常
臣處青山老營防禦五處之賊陸路存營之數除江西
協防兵勇及湖口紳士捐勇外不過二千九百人水路
存營之數除撥赴省河及分巡吳城外不過二千三百

人兵力至爲單薄而地形又覺散漫此臣處勉力支撐之情形也伏念臣軍自岳州而下水陸共萬餘人合併一支從未分散去歲以來陸軍分爲三支羅澤南率援鄂之師五千人爲一支周鳳山接統塔齊布之舊部四千人爲一支李元度等率平江各勇三千人爲老營之一支水軍分爲兩支武昌十營楊載福所統者爲外江一支鄱湖八營臣新調彭玉麐來此統帶者爲內湖一支旣已分而爲五矣而李元度駐湖之東又抽撥平江勇虎勇千餘人駐扎西岸是陸軍三支之外又分一小

支外江則李孟羣帶船六十號別入襄河內湖則前撥
船三十號外頃臣又飭彭玉麐帶船三十號馳赴臨江
是水師兩支之外又分二小支愈分則人數愈寡愈析
則氣勢愈弱其在湖北距臣八百餘里在臨江者距臣
五百餘里雖欲急圖合併而勢有不能至于行軍之道
擇將爲先得一將則全軍振興失一將則士氣消沮甲
寅年秋冬之間臣軍所以長驅千里勢如破竹者以陸
路有塔齊布羅澤南水路有楊載福彭玉麐諸人軍中
士卒皆以塔羅楊彭爲法沿江村市亦知塔羅楊彭之

名故能旌旂生色席卷無前不幸塔齊布中道殂謝而
羅澤南楊載福彭玉麋三人者又分往湖北臨江不克
遽聚一處而後起之才如周鳳山李續賓李元度數人
者又未知果能血戰成名仰邀

恩眷否

臣

久困一隅兵單將寡焦灼難名惟當督飭水

陸嚴防五路之賊俟湖北臨江兩處勦辦得手再圖會
合歸併一軍掃蕩羣醜以期仰副

宸厪所有疊奉

寄諭縷陳各路軍情恭摺由驛覆奏伏乞

皇上聖鑒訓示施行謹 奏

咸豐六年正月初九日

初定六事五月十八日

皇上聖鑒臨下詢于

各路堵剿情形疏

奏爲會籌各路堵剿情形遵

旨覆奏并請 飭下廣東迅撥重兵防守贛州恭摺奏
祈

聖鑒事二月初五日承准軍機大臣字寄咸豐六年正
月十七日奉

上諭文俊奏江西各屬賊勢蔓延請飭催兵撥餉一摺
已諭知葉名琛柏貴何桂清趕緊籌款撥解并飭知駱
秉章添調兵勇速飭劉長佑應援矣江西逆匪久踞臨

江瑞州分擾袁州吉安各屬賊勢披猖人心惶惑兵單
餉絀固係實在情形文俊甫經到任于該省地勢軍情
一時未能周悉現當萬分棘手之時倘布置稍疏難免
貽誤會國藩自抵江西爲時已久賊情亦所深悉此時
江西匪蹤幾欲蔓延全省旣不能處處調兵又不能顧
此失彼自應擇其最要之處先爲攻勦現在瑞州臨江
吉安袁州四府究竟何處賊情最爲凶悍周鳳山一軍
旣由新淦進兵自應急勦臨江瑞州以殄賊渠周汝筠
一軍現阻泰和尤應設法疏通俾得迅抵吉安劉長佑

一軍離楚後應由何路進勦方能扼要著曾國藩卽與
文俊妥速會商務籌全局不可徒事張皇亦不可專顧
一處軍情變幻靡常大勢所關應從何處下手身在行
間者必能挈其綱領該侍郎與該撫酌度機宜卽著會
同馳奏以慰廑念至德安縣城據文俊奏已被潯城賊
竄踞是否周鳳山全軍遠撤致有疏失抑或居隆阿等
堵勦不力致該匪復有竄出此路一有疏懈關係長江
大局該侍郎等近日如何布置并著速行奏報將此由
六百里諭令知之欽此仰見

聖主睠懷南服宵旰焦勞

指示機宜燭見萬里臣等欽佩之下尤切悚惶伏查江

西全省以贛水爲中路之經上發于贛南二府下達于

鄱陽一湖吉袁瑞臨及極北之九南兩郡皆在贛水與

鄱湖之西廣饒撫建及省會甯都一州皆在贛水與鄱

湖之東一水中分而兩岸州縣之多寡地形之大小蓋

略相等其袁州臨江二府之河名曰袁江至樟樹鎮而

滙于贛河樟樹鎮者西近瑞臨東接撫建兩岸之關鍵

省城之咽喉

諭旨垂詢最要之處臣等以爲此時形勢實以樟樹鎮

爲最要臣國藩飭周鳳山陸軍彭玉磨水師扎駐該鎮

臣文俊又調周尊彝林葆等之陸軍劉子醇之水師隨

同駐扎用全力扼守樟樹鎮以保東岸以衛省垣前此

正月初六日周鳳山山新淦回扎樟樹鎮之時本擬迅

速西渡進攻臨江因搭浮橋甫成爲二十一日狂風所

壞而東岸無重兵扼守又恐一經渡河頓兵堅城之下

反增東顧之憂此水陸嚴扼樟樹鎮未遽西勦之情形

也

諭旨垂詢何處賊情最爲凶悍一節查各路探報并搜
獲賊中文書據稱金陵逆匪由湖北通城入江境者以
僞翼王石達開爲首僞檢點賴裕新攻陷瑞州僞翼貴
丈夏姓僞豫王胡以晄攻陷袁州僞春官丞相張遂謀
夏官副丞相會姓先攻臨江後攻吉安粵東另股土匪
由湖南茶陵等處入江境者以周培春人數爲最多又
有賊目葛耀明陳守鄧象緯等均于瑞州投入石逆大
股內構粵東賊目王義潮統賊萬餘阻禦泰和使周汝
筠之師不得進援吉安

臣

文俊前因其救援不力曾

奏參摘去翎頂另調遊擊遮克敦布統率各勇四千由
樂安永豐一帶取道援吉詎遮克敦布起程數日卽得
吉安失守之信臣等卽令遮克敦布扼扎樂安屏蔽撫
建擬令周汝筠退回贛州防守該府贛郡天然雄鎮爲
古來必爭之地倘有疏虞則兩廣積年之零股湖南郴
桂之餘匪皆將以贛州爲巢穴後患不可勝言臣等一
面飭令駐贛文武設法防禦一面飭周汝筠折回郡城
協同環守惟賊眾兵單不得不急求外援相應請
旨飭下兩廣總督廣東巡撫迅派兵勇三四千人直赴

贛州會同戰守保此重鎮庶足顧全大局除吉安失陷
文武殉難各情另由臣文俊查明具奏外所有遵

旨會籌各路堵勦并請撥廣東援兵防守贛州緣由恭
摺由驛六百里覆奏伏乞

皇上聖鑒訓示施行謹奏

咸豐六年二月廿一日